

四庫全書

史部

欽定四庫全書

史部

汴京遺蹟志卷八

九

詳校官左都御史臣李紱

編修臣程嘉謨覆勘

覆校官主事臣龔敬身

校對官原任中書臣徐步雲

謄錄監生臣郭文鈇

欽定四庫全書

汴京遺蹟志卷八

明 李濂 撰

宮室

凡已見宋大內宮室及良岳內諸亭館不重錄

余聞之故老曰宋九帝都汴其宮室之盛載諸史冊圖誌者可考而知也歷歲滋久兵燹燔執河流衝溢悉蕩然無遺矣茲志遺蹟姑存其槩于此無亦使其湮滅無聞云爾

宮

太一宮

都城太一宮有三處一在城東南之蘓村為東太一宮一在城西南之八角鎮為西太一宮一

即五岳觀之舊址為中太一宮今俱廢

宋敏求春明退朝錄 太宗時建東太一宮於蘓

村遂列十殿而五福君綦二太一處前殿冠通天

冠服絳紗袍餘皆道服霓衣天聖中建西太一宮

前殿處五福君綦大遊三太一亦用通天絳紗之

制餘亦道冠霓衣熙寧五年建中太一宮內侍主

塑像乃請下禮院議十太一冠服禮院乃具兩狀

一如東西二宮之制一請盡服通天絳紗會有言
亳州太清宮有唐太一塑像上遣中使視之乃盡
服王者衣冠遂詔如亳州之制

葉少蘊石林燕語 太平興國中司天言太一式
有五福大游小游四神天一地一直符君綦臣綦
民綦凡十神皆天之貴神而五福所臨無兵疫凡
行九宮四十五年一易今自甲申歲入黃室巽宮
當吳分請即蘓州建宮祀之已而復有言今京城

東南有蘓村可應姑蘓之名乃改築于蘓村京師
建太一宮自此始此東太一宮也

龔明之中吳紀聞 太平興國六年方士言五福
太一在吳越分太一天之貴神也行度所至之國
民受其福故今蘓州建太一宮後以地遠不便於
禱祀遂於京城蘓村建之今天慶觀乃其舊址鄉
人尚有以宮巷宮前稱者

宋朝會要 天聖六年三月司歷言五福太一自

雍熙元年甲申及今四十五年太一行綦當入蜀郡之坤宮曰黃庭可於都城西南建祈宮於是詔擇八角鎮地建西太一宮

又曰神宗熙寧初即五嶽觀舊址營中太一宮蓋自仁宗天聖六年至熙寧五年壬子四十五年五福太一行綦自黃庭宮移入真室之中下臨京都之中故也

景靈宮

有二在城內端禮街東西宋大中祥符五年十一月建奉藝祖以下御容在內

郭若虛圖畫見聞誌 治平甲辰歲於景靈宮建
孝嚴殿奉安仁宗神御乃鳩集畫手畫諸屏展墻
壁先是三聖神御殿兩廊圖畫創業戡定之功及
朝廷所行大禮次畫講肄文武之事游豫燕享之
儀至是又兼畫一應仁宗朝輔臣呂文靖已下至
節鉞凡七十二人時張龍圖燾主其事乃奏請於
逐人家取影貌寫之駕行序列歷歷可識其面於
是觀者莫不嘆其盛美

李心傳朝野雜記 景靈有東西宮蓋祖宗以來
帝后神御皆寓道釋之館神宗元豐中始倣漢原
廟之制即景靈宮之東西為六殿每殿皆有館御
前殿奉宣祖以下御容而後殿以奉母后各揭以
美名徽宗崇寧初以景靈無隙地乃於馳道之西
立西宮以神宗為館御首哲宗次之號舊宮為景
靈東宮建炎改元之二日即命有司建景靈宮於
江寧帝后異殿然不克成渡江後自聖祖以下神

御皆寓温州天慶宮以祠部郎官兼知州若官使
相則兼景靈宮使典奉神御趙忠簡為相議築宮
臨安以奉祖宗神御而留聖祖於永嘉後不果紹
興十三年二月始遷於臨安然但通為三殿以奉
聖容無復東都之制矣或者謂忠簡之議乃王沂
公藏天書之意

九成宮

崇寧元年方士魏漢津請備百物之象鑄九鼎
四年三月九鼎成詔於中太一宮之南為殿以

奉安各周以垣上施睥睨墀以方色之土外築垣環
之名曰九成宮中央曰帝鼎其色黃祭以土王日為

大祠幣用黃樂用宮架北方曰寶鼎其色白祭以冬
至幣用阜東北曰牡鼎其色白祭以立春幣用阜東
方曰蒼鼎其色碧祭以春分幣用青東南曰罔鼎其
色綠祭以立夏幣用緋南方曰彤鼎其色紫祭以夏
至幣用緋西南曰阜鼎其色黑祭以立秋幣用白西
方曰皐鼎其色赤祭以秋分幣用白西北曰魁鼎其
色白祭以立冬幣用阜八鼎皆為中祠樂用登
歌享用素饌復於帝鼎之宮立大角鼎星之祠

寶成宮

大觀三年詔以鑄鼎之地作寶成宮總屋七十
區中置殿曰神靈以祀黃帝東廡殿曰成功以

祀夏后氏西廡殿曰持盈以祀周成王及周公旦召
公奭後置堂曰昭應以祀唐李良及隱士嘉成侯魏
漢津詔每歲八月二十五日舉祀事祀黃帝為大祠
幣用黃樂用宮架其成功持盈二殿為中祠幣用白
昭應堂為小
祠並用素饌

馬端臨文獻通考 按三代之九鼎未聞有神司之而列之祀典也崇寧時用方士魏漢津之說鑄九鼎而各以其方色祭之抑不知司鼎者何神歟至於因采首山銅之說而祀黃帝因貢金九牧之說而祀夏后氏因定鼎郊廓之說而祀成王周召然此數聖賢之所以當祀者固不以鼎也若魏漢津則當時獻言鑄鼎之方士耳乃亦尸而祝之俾侑食於數聖賢其褻慢不經亦甚矣

朝元萬壽宮

在城內汴河之側金兵燬之今延慶觀即朝元萬壽宮之齋堂也

周密癸辛雜識 朝元宮殿前有大石香鼎二製作高雅熙春閣前元有十餘座徽宗每宴熙春則用此燒香於閣下香煙蟠結凡數里有臨春結綺之意朝元宮虛皇臺亦上清移來者下有青石礎二刻龍鳳團花極工巧舊時是朱溫椒蘭殿舊物臺上有拜石方廣二丈許光瑩如碧玉四畔刻龍鳳雲霞環繞內留品字三方素地云是宣政內醮

時徽廟立於中林靈素王文則居兩旁也

玉清昭應宮

大中祥符元年初議營是宮安寘天書命有司料功須十五年乃就修宮使丁謂令

以夜繼晝每繪一壁給二燭至七年十一月宮成凡二千六百二十楹制度闋麗屋宇少不中程式雖金

碧已具必令毀而更造有司莫敢較其費初宮之成也時王魏公為首相始命充使宮觀置使自此始天

聖七年夏六月丁未夜大雷雨宮內火起至曉宮室幾盡僅存長生崇壽二小殿范雍王曙等以為災變之來若有警者願除其地罷諸禱祀以荅天怒乃下詔不復繕修以長生崇壽二小殿改為萬壽觀罷諸

宮觀使

宋史 真宗大中祥符元年作玉清昭應宮奉天

書也知制誥王曾都虞候張旻皆上疏諫不聽

孫升談圃 玉清昭應宮丁晉公董其役土木之
工極天下之巧繪畫無不用黃金四方古名畫皆
取至置之壁龕廡下又以其餘材修建五岳觀世
猶謂之木天則玉清之宏壯可知玉清宮道院則
今萬壽觀是也後玉清五岳皆焚獨道院在耳

葉少蘊石林燕語 大中祥符五年玉清昭應宮
成王魏公為首相始命充使宮觀置使自此始然

每為見任宰相兼職天聖七年呂申公為相時朝廷崇奉之意稍緩因上表請罷使名自是宰相不復兼使康定元年李若谷罷參知政事留京師以資政殿大學士為提舉會靈觀事宮觀置提舉自此始自是學士待制知制誥皆得為提舉因以為優閒不任事之職熙寧初先帝患四方士大夫年高者多疲老不可寄委罷之則傷恩留之則玩政遂仍舊宮觀名而增杭州洞霄及五嶽廟等並依

西京崇福宮置管勾或提舉官以知州資序入充
不復限以負數故人皆得以自便

上清儲祥宮

太宗至道元年上清宮成慶歷三年火其
後復修以宮之所在為國家子孫也因賜

名上清儲祥宮命蘇軾
撰碑文以紀其事

宋敏求東京記 端拱元年二月太宗詔取晉邸

時太祖所賜金帛建上清儲祥宮至道元年八月

宮成帝御書額金填其字賜之仁宗慶歷三年十

一月火熙寧元豐間靈惠法師王太初再營之元

祐初年宣仁太皇太后為出粧粉錢重建

孫升談圃 上清儲祥宮太宗建之為民祈福神
宗以其地屬震欲新之至元祐初落成宦人陳衍
領其事凡當用黃金處皆以丹朱代之宮成兩宮
臨幸肆赦

許有壬上清儲祥宮記畧 宮始太宗作於朝陽

門外

蘇碑
作內

不五十年而火以其地為禁軍營監察

御史裏行包拯上疏請勿修故也又三十七年復

事脩建歷十三年而後成蓋元祐六年也翰林學士承旨蘇公作碑未幾誣以失實毀之令蔡京別撰金源氏復葺翰林侍讀學士趙秉文有文歲壬辰元兵下汴宮觀僅存師徒解散時全真之教方興長春公起海濱至西域見上論道以修身治國撫民止殺為對上大悅長春法系之弟為太古郝公太古傳栖雲王公長春以汴重陽觀故基實主教重陽真君昇化之地命栖雲主之營建幾三十

年是為朝元宮丞相史公復請兼主太一上清諸
宮觀事惟上清為潦水所圯規模宏濶力不能復
命巨提點者購地於惠和坊為畝六十撤故宮材
崇三清之殿于前次列真之宇於後神門壇壝左
右雲堂四周接屋餘百楹雖非其地而名不泯也
以上十宮今皆不存矣惟城之西南隅有大道
宮焉正德初因佑聖觀舊基而修也乃若延福
宮玉清神霄宮

舊名玉清
和陽宮

上清寶籙宮俱已載

之第一卷大內宮室條下茲不重錄

樓

望京樓

即汴城西門樓也樓舊無名唐令狐綯登樓詩有望京字因名

遇僊樓

在南薰門裏街西有異僧之事趙秉文作滿庭芳詞以紀之

明月樓

在州橋南街東洪武十五年毀廢其址今為稅課司

黑樓子

在宣平坊勾欄街之北即金相崔立省街樓

寶津樓

在城西鄭門外瓊林苑內

長慶樓

紅翠樓

俱在鼓樓北街西

玉樓

狀元樓

俱在新橋東北

豐樂樓

舊名樊樓

和樂樓

舊名莊樓

得勝樓

鐵屑樓

慶豐樓

楊樓

玉川樓

欣樂樓

潘樓

以上俱在土市子街

會僊樓

在雷家橋北

熙熙樓

在第三巷東

胡樓

在南薰門外西南

清風樓

在裏城外西南

宜城樓

班樓

俱在大梁門外街北

看牛樓

在仁和門外

蜘蛛樓

在宋門外

劉樓

在金梁橋下

八僊樓

在城北

集賢樓

蓮花樓

俱在鄭門外宋時士大夫于此餞別

宴賓樓

在金明池之西

自遇僊樓而下諸樓俱燬于金兵

譙樓

一名鼓樓在城內安業坊臺高三丈上建樓下置甕門通東西行路自築建之後敝壞不修俗謠言

復修則有河水之患故廢而弗治號破鼓樓嘉靖初鎮守太監呂憲排衆議復修煥乎改觀卒無水患

鐘樓

在城內新昌坊規制畧如譙樓而高濶宏麗過之上懸巨鐘以警昏曉宣德中左布政使李禎復葺

之成化十六年鎮守太監藍
忠巡撫都御史李紱重修

以上二樓俱非宋建姑附于此

閣

資聖閣

即相國寺之後閣都人夏日于此納涼八景中資聖薰風是也

玉皇閣

在延慶觀三清殿後近燬于火

藏經閣

有二一在相國寺一在天王寺俱藏先朝所賜藏經今卷帙殘闕殆盡矣

尊經閣

在府學明倫堂後以上三閣俱非宋建姑附于此

周密癸辛雜識 汴城樓閣最高而見存者惟相

國寺資聖閣朝元宮閣登雲樓資聖閣雄麗五簷
滴水廬山五百銅羅漢在焉國初曹翰所取者也
朝元宮閣即舊日上清儲祥宮移至者宕堯半空
登雲樓俗呼為八大王樓又稱譚樓蓋初爲燕王
元儼所居後爲巨璫譚積有之其奇峻雄麗皆非
東南所有也

亭

新亭

在城內唐汴州刺史
令狐楚建劉禹錫記

省街亭

在南薰門
內東南

信陵亭

在相國寺前魏公
子無忌勝遊之地

公子亭

在麗景門外公
子謂無忌也

大梁亭

在大梁門
外之西

流盃亭

在城西
北隅

以上諸亭俱燬于金兵今不存矣

駐蹕亭

在布政司圓堂後洪武元年五月車駕幸汴詔
建行宮比去留大旗以鎮中原後因構亭表之

今廢此亭非宋
建附載于此

門

夷門

在安遠門內
夷山之上

趙與峕賓退錄

侯羸爲夷門監者按大梁城門

東曰夷門則夷門者大梁之一門耳後人遂直指

汴京爲夷門非也容齋續筆辯臺城少城類此

沙門

在縣西東和保沙積深厚其形似門故名

小陡門

在縣西永安保宋時疊石砌開以積汴水

堂

資善堂

仁宗肄學之所也在元符觀南大中祥符八年建天禧四年徙御厨北

宋朝會要 大中祥符九年二月詔元符皇子就

學之所宜以資善堂爲名

繼聖堂

在開封府治之東宋主習射之所也今廢

宋敏求東京記

太宗尹京日官署東建堂習射

大中祥符二年閏二月真宗臨幸宰臣請以繼聖

爲名許之

梅花堂

在開封府正廳之後即所謂後堂也後改爲公生明堂

拱奎堂

在本府治內宋錢藻尹開封建今廢

清虛堂

在汴城內之東隅宋王鞏建蘇軾有記今廢

三聖堂

三聖者祀觀音大士義勇武安王清源妙道真君也在大梁門外半里許即宋都亭西驛以待

夏國使臣之所按東京夢華錄云都亭西驛在寶相寺東相對都城元末兵廢國朝洪武初周藩即其址創立廟宇乃移白瓦殿之神祀之于內其三聖之像仍舊不改景泰乙亥居民甄義等率衆重修

三槐堂

在仁和門外宋兵部侍郎王祐手植三槐于庭曰吾後世子孫必有為三公者祐子旦相真宗

遂號三槐王氏因扁其堂曰三槐堂蘇軾為銘金季兵燬

蘇軾三槐堂銘

天可必乎賢者不必貴仁者不

必壽天不可必乎仁者必有後二者將安取衷哉

吾聞之申包胥曰人衆者勝天天定亦能勝人世

之論天者皆不待其定而求之故以天爲茫茫善

者以怠惡者以肆盜跖之壽孔顏之厄此皆天之未定者也松栢生於山林其始也困於蓬蒿厄於牛羊而其終也貫四時閱千歲而不改者其天定也善惡之報至於子孫而其定也久矣吾以所見所聞所傳聞考之而其可必也審矣國之將興必有世德之臣厚施而不食其報然後其子孫能與守文太平之主共天下之福故兵部侍郎晉國王公顯於漢周之際歷事太祖太宗文武忠孝天下

望以爲相而公卒以直道不容於時蓋嘗手植三槐於庭曰吾子孫必有爲三公者已而其子魏國文正公相真宗皇帝於景德祥符之間朝廷清明天下無事之時享其福祿榮名者十有八年今夫寓物於人明日而取之有得有否而晉公修德於身責報於天取必於數十年之後如持左契交手相付吾是以知天之果可必也吾不及見魏公而見其子懿敏公以直諫事仁宗皇帝出入侍從將

帥三十餘年位不滿其德天將復興王氏也歟何其子孫之多賢也世有以晉公比李栖筠者其雄才直氣真不相上下而栖筠之子吉甫其孫德裕功名富貴略與王氏等而忠信仁厚不及魏公父子由此觀之王氏之福蓋未艾也懿敏公之子輩與吾遊好德而文以世其家吾是以錄之銘曰
嗚呼休哉魏公之業與槐俱萌封植之勤必世乃成既相真宗四方砥平歸視其家槐陰滿庭吾儕

小人朝不及夕相時射利違卹厥德庶幾僥倖不
種而獲不有君子其何能國王城之東晉公所廬
鬱鬱三槐惟德之符嗚呼休哉

葉少蘊石林燕語 太祖與符彥卿有舊常推其
善用兵知大名十餘年有告謀叛者亟徙之鳳翔
而以王晉公祐為代且委以密訪其事戒曰得實
吾當以趙普所居位命汝面授旨徑使上道祐到
彼察知其妄數月無所聞驛召面問因力為辨曰

臣請以百口保之太祖不樂徙祐知襄州彥卿竟亦無他祐後創居第於曹門外手植三槐於庭曰吾雖不為趙普後世子孫必有登三公者已而魏公果為太保歐陽文忠作王魏公神道碑畧載此語而國史本傳不書余嘗親至其家聞其子弟言之

館

柳林館

在城東之南神岡保宋時都人遊宴之所後淪于水

同文館

在大梁門外西北宋時待高麗使臣之所

班荆館

在封丘門外之東宋待蕃使之所

禮賓館

舊名番譯院在金梁橋西南汴河南岸景德三年改為禮賓館

以上諸館俱燬于金兵今不存矣

吉室池園苑洞峽渚汧

吉室

吹臺

在城東南三里相傳漢之鼓吹臺一名梁臺一名雪臺俗呼為二姑臺今改為禹王臺祀禹于其上

兩廡祀古之善治水者為河患也詳見後禹廟下

宴臺

在城東北十五里宋帝春耕籍田于東郊祀先農畢享胙宴百官于此

迎秋臺

在園子門外後唐莊宗築宋人九日于此登高

靈臺

在城南二十里梁惠王築一名惠王臺

百花臺

在園子門外宋徽宗築

拜郊臺

在城南十里其東又有東拜郊臺並宋時築

沙兀臺

在城東南鄭店保臺上有鄭安平廟元季兵燬惟臺存焉

奉天臺

洪武元年車駕幸汴駐蹕於河南行省以為行宮於圓堂後西北築臺以為奉天之所故名後

屢經黃河入城淤平

祭封臺

在南薰門外洪武元年車駕幸汴時築以祀神者以上二臺非宋建附載于此

池

蓬池

在城東春秋宋之蓬澤也瀰漫遠濶南入尉氏之境其下有溫泉焉漢志引汲冢竹書云梁惠王發

蓬忌之數以賜民浚儀有蓬陂忌澤是也唐玄宗更名福源池天寶初士大夫禊飲于此後累經黃河淤

平今不見其跡

金明池

在城西鄭門外西北周迴九里餘周世宗顯德四年欲伐南唐始鑿內習水戰宋太平興國七

年太宗嘗幸其池閱習水戰徽宗政和中於池內建殿宇池門內南岸西去百餘步有臨水殿北去百餘步有僊橋朱漆欄楯下排雁柱中央隆起如飛虹之狀橋盡處而殿正在池中四岸石甃南有高臺上有

橫觀廣百丈許曰寶津樓樓之南有宴殿殿西有射殿南有橫街牙道柳徑乃都人擊毬之所車駕臨幸觀騎射百戲于此後燬于金兵

葉少蘊石林燕語 金明池龍舟太宗時造每歲

春駕上池必登之紹聖初亦嘗命別造形制有加于前亦號工麗余時正登第在京師初成瓊林賜宴蔡魯公為承旨中休往登以觀至半輒墜未幾不免相繼哲宗臨幸是日大風晝冥池水盡波儀衛不能立竟不能移跬步自後遂廢不用二事適

相似亦可怪也

方池圓池

在南薰門外玉津園之側宋帝臨幸遊賞之所

迎祥池

在普濟水門之西宋真宗時鑿

蓮花池

有二一在城比時和保一在城西北永安保

凝碧池

在陳州門裏繁臺之東南唐為牧澤宋真宗時改為池

曲江池

鳳池

雁池

平池

俱在艮岳壽山之下今廢

園

梁園

在城東南三里許相傳為漢梁孝王遊賞之所李白梁園吟云平臺為客幽思多對酒遂作梁園歌

却憶蓬池阮公詠因吟渌水揚洪
波一名梁苑孝王築吹臺于苑中

芳林園

地在園子門裏東北宋太宗在晉邸時太祖賜其地為園即位後號潛龍園內有池沼淳化三年

帝幸其池謂近臣曰昔尹京日無事常飲池上今池邊之樹已成喬木矣因顧敦坊使郭守忠等曰汝等

前日以樂童從我今亦皓首矣何光陰易過如此因登水心亭習射中的者上親斟滿舉大白詔群臣盡

醉後廣其地號奉真園仁宗天聖七年改名芳林園金兵燬之今失其處

玉津園

在南薰門外

下松園

在城西鄭門外

藥朶園

養種園

俱在城西水門外

一丈佛園

在城南西南

馬李良園

在裏城外西南

景初園

在城南
鳳城岡

奉靈園

在陳州門
內西北

靈禧園

在陳州門
之東北

同樂園

在固子門內東
北宋徽宗置

以上諸園皆宋時都人遊賞之所今俱廢

苑

瓊林苑

在城西鄭門外俗呼為西青城宋時建苑為宴
進士之所與金明池南北相對其中松栢森列

百花芬郁苑東南隅政和間創築華觚岡高數丈上
有橫觀層樓金碧相射下有錦石纏道寶砌池塘柳

鎖虹橋花紫鳳舸又有明池
梅亭牡丹諸亭不可勝數

迎春苑

在麗景門外東北舊名東御苑宋初宴進
士之所每歲迎春于此後改為富國倉

宜春苑

有二一在固子門外宋人號西御園一在麗景門外號東御園

牧苑

在陳橋之東北宋牧養馬駝牛羊之所

以上諸苑俱為金元兵燬今失其故處

洞

老君洞

在艮岳壽山之西北徽宗供奉道像之所迷真洞亦在艮岳

桃花洞

在揚州門內西北即上清宮道士所居之處環植以桃故名桃花洞

峽

濯龍峽

在艮岳壽山之間金人展城廢之

渚

蘆渚

梅渚 並在艮岳壽山之下徽宗於平池內作兩洲東為蘆渚西為梅渚金人展城廢

之矣

汧

白龍汧

在艮岳壽山之下為金人展城所廢

自老君洞以下諸蹟湮廢已久莫詳其故處矣
昔召公告成王曰不作無益害有益功乃成至
哉斯言豈非萬世之永監哉

汴京遺蹟志卷八

欽定四庫全書

汴京遺蹟志卷九

明 李濂 撰

岡堆坡陂關梁井墓

岡

牟駝岡

在城西北十五里宋天驕監牧養御馬駝騾之所靖康時金將幹里雅布統鐵騎南馳攻圍汴京

屯兵于此後黃河衝激坍塌平夷矣

丘濬世史正綱 靖康元年春正月癸酉女真犯

京師兵屯牟駝岡按牟駝岡乃宋朝牧馬之所芻

豆山積往年郭樂師來朝奉命擊毬于其間至是
導金人據之資其芻豆飼馬得以久屯嗚呼後世
積蓄者盍為城守毋為大盜之資乎

鳳城岡在城西南三里許舊有奉聖寺號奉聖寺岡後
金兵犯汴燬其寺金章宗時有二鳳凰率諸鳥
飛落于此人遂稱為
鳳城岡亦曰鳳凰岡

望牛岡在城西南十里汴京城形勢如卧牛
狀登是岡以望之則居然可見故名

百岡在城東北三十里有土堆百餘世傳宋文帝元嘉
中檀道濟與北魏戰糧盡而返魏軍襲之道濟夜
唱籌量沙積至百堆以紿之魏
軍見之果退道濟全師而還

獨樂岡

在城東十五里相傳宋時有一富翁居此男女婚嫁已畢翁不問家事日邀故舊飲酒為樂

宗微行見之羨曰斯人其獨樂哉後因而名其岡

鶴村岡

在城南五十里宋時嘗命獵者養鷹鶴于此因名

牛尾岡

在封丘門外東一里許俗以汴城為卧牛城而此岡則牛之尾也

霍赤岡

在城東北二十里遼主耶律德光滅晉嘗屯兵于此

狼城岡

在城西三十里

杏花岡

在城西南十五里一名青龍岡

藥局岡

在城西二十里舊為朝元宮之藥局

長腰岡

在城東北二十五里一名長葉岡

僊遊岡

在城東北二十五里一名牽牛岡

侯家岡

在城南十八里

堠子岡

在城西南六十里

井家岡

在城西南十五里

七里岡

在城西南七里

八角岡

在城西南三十里

白墓子岡

在城南二十里

萬龍岡

在城東南五十里

祝岡

在城東南五十里

鍾家岡

在城東南五十里

赤倉岡

在城東南四十五里又名關頭岡

蘇村岡

在城東南十里

毛岡

在城東南二十五里

黑岡

在城西北二十五里

太平岡

在城東二十里

沙窩岡

在城東北二十五里

袁家岡

在城東北二十五里一名北神岡

南神岡

在城東北二十里

縮頭岡

在城東二十五里

角橋岡

在城東北五里

邊村岡

在城東五里

殷家岡

在城東十里

白石岡

在城東二十五里

胡岡

在城東二十五里

傅家岡

在城東二十里

楊子岡

在城東北二十里

槐疙疸岡

在城東北三十里

兔白岡

在城東北四十里

蘇家岡

在城西五里

獅子岡

在城西三十五里

以上諸岡累經黃河衝淤存者無幾而居人猶

能指其遺址焉

堆

青堆

有二一在城東密務保之東
北一在城西南毛保之西

申家堆

在城西永安保

大營堆

在城西八角保之東

王家堆

在城西南南毛保之東南

坡

幕天坡

在封丘門外宋將李綱嘗敗
金兵于此後為河水淤平

胭脂坡

在城西北東和保之西朝幕斜暉
照之宛若胭脂俗呼為紅沙岡

陂

夏侯陂

好草陂

俱在城西南
朱僊鎮保

勃臍陂

在宋門外

寒陂

在城西南關
店保之北

練子陂

在城西南關
店保之西北

牧兒陂

青頭陂

俱在城西南
關店保之西

關

臨蔡關

在城東南赤倉保周世宗顯德中浚閘河入蔡河命水軍駕戰艦沿潁入淮以伐南唐置關于

此金季關廢居人仍呼此為關頭

通津關

在城東北馬尾牆保埽頭周世宗顯德四年疏汴水入五丈河以通齊魯舟楫于此設關元時

河漲
淤塞

橋梁

天漢橋

一名
州橋

金梁橋

浚儀橋

龍津橋

青暉橋

雲驥橋

宣化橋

白虎橋

雷家橋

馬軍衙橋

以上諸橋在都城內
外汴蔡二河故道上

陳橋

在城東北四十五里即
宋藝祖為衆擁立處也

井

海眼井

在安遠門裏上方寺內相傳泉源通海故名元末寺燬于兵而井失其跡

義井

在城西金梁橋之南相傳元時邑民劉道源因往來人衆造舍于上設汲水之具遇盛夏時則汲以

濟人故名

三井

在鼓樓東街之北井口一石而三眼故名

八角井

在城西

甘泉井

在徐府街洪武末河水入城水皆鹹苦飲之者多感瀾痢之疾永樂癸未夏魏國公徐達宅後忽涌一泉色潔味甘

于汴中教授滕碩有記

府學新井

在開封府儒學內名賢祠南正德癸酉秋七月教授榮昌冷宗元開鑿井水清冽飲者甘

之以上二井俱非宋井也姑附于此

冷宗元撰井記

開封郡學文廟東有名賢祠祠

南有隙地東為宰牲所每歲丁祀潔牲滌器水必
取于他井甚艱焉是歲秋七月丙子宗元白於方
伯楊公給以脩井之直郡守賀侯乃專人以董其
役壬午宗元相隙地之西命匠氏鑿之僅仞許中
有一石揭其石遂得故井焉深可四仞其泉冽其
味甘而甃砌完整如故於是補甃井口作轆轤旁
開小渠西通神庖墻以達於泮池潔滌牲器者皆

資其用而池之魚藻亦藉以溉之八月丁日釋奠
于先師丙申藩臬諸公省牲咸飲而甘之嘆曰異
哉井乎其學校之徵邪是月壬戌揭榜門生中者
五人而李生濂發解斯亦異也已提學僉憲劉公
命宗元記其事竊聞孔氏以井喻德孟氏以井喻
學畫于易咏于詩散記于史籍蓋井體有常而應
變不窮學者進德之地也然德者致用之本時者
用德之幾有其德而弗遇其時井渫之不食孔孟

是已有其德而又遇其時并收之勿幕伊周是已
噫德之脩不脩在我也世之用不用在人也時之
遇不遇在天也君子亦惟修其在我者其在天在
人則靜俟而順受之耳何容心焉二三子來游來
歌挹斯泉而味斯味其於聖門體用之學將默有
所悟者矣豈直資夫滌漑而已哉楊公名子器慈
谿人劉公名玉萬安人賀侯名銳臨汾人

陵墓

倉頡墓

在城北時和保俗呼為倉王塚是也按禪通紀倉頡居陽武而葬利鄉所謂利鄉即時和保之

墟也

梁王墓

在城西八角保高三丈廣百餘步無碑文可考世稱魏陵地名梁固疑即魏梁王之塚也

信陵君墓

在城東南揚州門之南公子無忌卒塋此

朱亥墓

在城西南朱儗鎮保俗呼為屠兒墓

扁鵲墓

在大梁門外西北菩提寺之東原在子城內唐元和十五年宣武軍節度使張弘靖徙瘞于此

張儀墓

在城東北七里儀魏人也為秦相卒塋此

趙王墓

在城東北母寺保乃漢趙王張耳也

欽定四庫全書



汴京遺蹟志

靈昭陵

在城東北四十五里馬尾牆保其地即春秋宋之黃鄉世傳漢高祖兵敗于此母因死焉後具

梓宮招魂塋之有丹蛇出水中自躍入于梓宮其躍處有遺髮乃號靈昭陵其地曰小黃園因置小黃縣

陵寢累經河水淤平

蔡邕墓

在城東北四十五里

李衛公墓

在城西南開店保唐李靖塋此

段志賢墓

在開店保之王家莊

單雄信墓

在仁和門內西北隅國初為左護衛軍營

王文正公墓

在城東大邊村宋丞相王文正公旦塋此

歐陽脩撰王文正公神道碑 至和二年七月乙

未樞密直學士右諫議大夫王素奏事殿中已而
泣且言曰臣之先臣旦相真宗皇帝十有八年今
臣素又得待罪侍從之臣惟是先臣之訓其遺業
餘烈臣實無似不能顯大而墓碑至今無辭以刻
惟陛下哀憐不忘先帝之臣以假寵於王氏而勗
其子孫天子曰嗚呼惟汝父旦事我文考真宗叶
德一心克終厥位有始有卒其可謂全德元老矣

汝素以是刻于碑素拜手稽首出明日有詔史館
脩撰歐陽脩曰王旦墓碑未立汝可以銘臣脩謹
按故推誠保順同德守正翊戴功臣開府儀同三
司守太尉充玉清昭應宮使上柱國太原郡開國
公贈太師尚書令兼中書令追封魏國公謚曰文
正王公諱旦字子明大名莘人也皇曾祖諱言滑
州黎陽令追封許國公皇祖諱徹左拾遺追封魯
國公皇考諱祐尚書兵部侍郎追封晉國公皆累

贈太師尚書令兼中書令曾祖妣姚氏魯國夫人
祖妣田氏秦國夫人妣任氏徐國夫人邊氏秦國
夫人公之皇考以文章自顯漢周之際逮事太祖
太宗為名臣嘗諭杜重威使無反漢拒盧多遜害
趙普之謀以百口明符彥卿無罪故世多稱王氏
有陰德公之皇考亦自植三槐于庭曰吾之後世
必有為三公者此其所以志也公少好學有文太
平興國五年進士及第為大理評事知臨江縣監

潭州銀場再遷著作佐郎與編文苑英華遷殿中
丞通判鄭濠二州王禹偁薦其材任轉運使驛召
至京師辭不受獻其所為文章得試直史館遷右
正言知制誥知淳化三年禮部貢舉遷虞部員外
郎同判吏部流內銓知考課院右諫議大夫趙昌
言參知政事公以婚避嫌求解職太宗嘉之改禮
部郎中集賢殿脩撰昌言罷復知制誥仍兼脩撰
判院事召賜金紫久之遷兵部郎中居職真宗即

位拜中書舍人數日召為翰林學士知審官院通
進銀臺封駁事公為人嚴重能任大事避遠權勢
不可干以私由是真宗益知其賢錢若水名能知
人常稱公曰真宰相器也若水為樞密副使罷召
對苑中問誰可大用者若水言公可真宗曰吾固
已知之矣咸平三年又知禮部貢舉居數日拜給
事中知樞密院事明年以工部侍郎參知政事再
遷刑部侍郎景德元年契丹犯邊真宗幸澶州雍

王元份留守東京得暴疾命公馳自行在代元份
留守二年遷尚書左丞三年拜工部尚書同中書
門下平章事集賢殿大學士監脩國史是時契丹
初請盟趙德明亦納誓約願守河西故地二邊兵
罷不用真宗遂欲以無事治天下公以謂宋興三
世祖宗之法具在故其為相務行故事慎所改作
進退能否賞罰必當真宗久而益信之所言無不
聽雖他宰相大臣有所請必曰王某以為如何事

無大小非公所言不決公在相位十餘年外無夷狄之虞兵革不用海內富實羣工百司各得其職故天下至今稱為賢宰相公於用人不以名譽必求其實苟賢且材矣必久其官衆以為宜某職然後遷其所薦引人未嘗知寇準為樞密使當罷使人私公求為使相公大驚曰將相之任豈可求邪且吾不受私請準深恨之已而制出除準武勝軍節度使同中書門下平章事準入見涕泣曰非陛

下知臣何以至此真宗具道公所以薦準者準始
愧歎以為不可及故參知政事李穆子行簡有賢
行以將作監丞居于家真宗召見慰勞之遷太子
中允初遣使者召之不知其所止真宗命至中書
問王某然後人知行簡公所薦也公自知制誥至
為相薦士尤多其後公薨史官脩真宗實錄得內
出奏章乃知朝廷之士多公所薦者公與人寡言
笑其語雖簡而能以理屈人默然終日莫能窺其

際及奏事上前羣臣異同公徐一言以定今上為
皇太子太子諭德某見公稱太子學書有法公曰
諭德之職止於是邪趙德明言民饑求糧百萬斛
大臣皆曰德明新納誓而敢違請以詔書責之真
宗以問公公請勅有司具粟百萬於京師詔德明
來取真宗大喜德明得詔書慚且拜曰朝廷有人
大中祥符中天下大蝗真宗使人於野得死蝗以
示大臣明日它宰相有袖死蝗以進者曰蝗實死

矣請示于朝率百官賀公獨以為不可後數日方
奏事飛蝗蔽天真宗顧公曰使百官方賀而蝗如
此豈不為天下笑耶宦官劉承規以忠謹得幸病
且死求為節度使真宗以語公曰承規待此以瞑
目公執以為不可曰他日將有求為樞密使者奈
何至今內臣官不過留後公任事久人有謗公於
上者公輒引咎未嘗自辨至人有過失雖人主盛
怒可辨者辨之必得而後已榮王宮火延前殿有

言非天災請置獄劾火事當坐死者百餘人公獨
請見曰始失火時陛下以罪已詔天下而臣等皆
上章待罪今反歸咎於人何以示信且火雖有迹
寧知非天譴邪由是當坐者皆免日者上書言宮
禁事坐誅籍其家得朝士所與往還占問吉凶之
說真宗怒欲付御史問狀公曰此人之常情且語
不及朝廷不足罪真宗怒不解公因自取嘗所占
問之書進曰臣少賤時不免為此必以為罪願并

臣付獄真宗曰此事已發何可免公曰臣為宰相
執國法豈可自為之幸於不發而以罪人真宗意
解公至中書悉焚所得書既而真宗悔復馳取之
公曰臣已焚之矣由是獲免者衆公累官至太保
以病求罷入見滋福殿真宗曰朕方以大事託卿
而卿病如此因命皇太子拜公公言皇太子盛德
必任陛下事因薦可為大臣者十餘人其後不至
宰相者李及凌策二人而已然亦皆為名臣公屢

以疾請真宗不得已拜公太尉兼侍中五日一朝
視事遇軍國大事不以時入參決公益惶恐因卧
不起以疾懇辭冊拜太尉玉清昭應宮使自公病
使者存問日常三四真宗手自和藥賜之疾亟遽
幸其第賜以白金五千兩辭不受以天禧元年九
月癸酉薨于家享年六十有一真宗臨哭輟視朝
三日發哀于苑中其子弟門人故吏皆被恩澤即
以其年十一月庚申塋公於開封府開封縣新里

鄉大邊村公娶趙氏封榮國夫人後公五年卒子男三人長曰司封郎中雍次曰贊善大夫冲次曰素女四人長適太子太傅韓億次適兵部員外郎直集賢院蘇耆次適右正言范令孫次適龍圖閣直學士兵部郎中呂公弼公事寡嫂謹與其弟旭友悌尤篤任以家事一無所問而務以儉約率勵子弟使在富貴不知為驕侈兄子睦欲舉進士公曰吾常以太盛為懼其可與寒士爭進至其薨也

子素猶未官遺表不求恩澤有文集二十卷乾興元年詔配享真宗廟庭臣脩曰景德祥符之際盛矣觀公之所以相而先帝之所以用公者可謂至哉是以君明臣賢德顯名尊生而俱享其榮歿而長配於廟可謂有始有卒如明詔所褒昔者烝民江漢推大臣下之事所以見任賢使能之功雖曰山甫穆公之詩實歌宣王之德也臣謹考國史實錄至於縉紳故老之傳得公終始之節而錄其可

紀者輒聲為銘詩昭示後世以彰先帝之明以稱聖恩褒顯王氏流澤子孫與宋無極之意銘曰

烈烈魏公相我真宗真廟翼翼魏公配食公相真宗不言以躬時有大事事有大疑匪卜匪筮公為著龜公在相位終日如默問其夷狄包裹兵革問其卿士百工以職問其庶民耕織衣食相有賞罰功當罪明相所黜升惟否惟能執其權衡萬物之平孰不事君胡能必信孰不為相其誰有終公薨

于位太尉之崇天子孝思來薦清廟侑我聖考惟
時元老天子念公報公之隆春秋從享萬祀無窮
作為詩歌以諗廟工

洪邁容齋隨筆

祥符以後凡天書禮文宮觀祭

祀巡幸祥瑞頌聲之事王文正公旦實為參政宰
相無一不預公知得罪于清議而固戀患失不能
決去及臨終乃欲削髮僧服以歛何所補哉魏野
贈詩云西祀東封今已了好來相伴赤松遊可謂

君子愛人以德矣歐陽公作神道碑悉隱而不書
蓋不可書也公持身公清無一可議然獨有此者
功名之際人所難耳

李駙馬墓

在城東北南神岡宋駙馬都尉鎮國將軍節
度使贈尚書令許和文公李遵勗墓此

葉少蘊石林燕語 祖宗時駙馬都尉宅主薨例

皆復納入官或別賜第曹沂王宅高懷德舊第也

李和文宅亦王貽永舊第自和文始世有之宏麗
甲諸主第園池尤勝號東莊和文好賢樂士以楊

文公為師友其子孫多守家法一時名公卿率從之遊宣和間復取以為擷芳園後改寧德宮以居寧德皇后云

李留後墓

名端懿乃駙馬遵最之子也官至鎮潼軍節度觀察留後附葬于父遵墓側

歐陽脩撰鎮潼軍節度觀察留後李公墓誌銘

嘉祐五年八月某日鎮潼軍節度觀察留後知澶州軍州事隴西李公得暴疾薨于州之正寢其以疾聞也上乃宴禁中為止樂命中貴人馳國醫往

視未及行而以薨聞詔輟視朝一日賜其家黃金三百兩贈公感德軍節度使已而又贈兼侍中太常謚曰某即以其年某月某日葬於開封府開封縣褒親鄉先塋之次公諱端懿字元伯開封人也右千牛衛將軍贈太師尚書令兼中書令隴西元靖王諱崇矩之曾孫連州刺史贈太師諱繼昌之孫鎮國軍節度使駙馬都尉贈尚書令兼中書令許和文公諱遵勗之子母曰齊國獻穆大長公主

太宗之女真宗之妹今天子之姑屬親而尊禮秩
崇顯其淑德美問彰于內外而和文公好學不倦
折節下士喜交名公卿一時翕然號稱賢尉故李
氏之盛受寵三朝而天下之士不侈其榮而樂道
其德公為冢子於其家法習見安行不待教告少
篤學問長而孝友喜為詩工書畫至於陰陽醫術
星經地理無所不通七歲為如京副使歷文思副
使供備庫使洛苑使新州刺史康懷二州團練使

濟州防禦使坐知冀州失捕妖人降授單州團練
使知均州未行改滑州兵馬鈐轄居歲中遷汝州
防禦使蔡州觀察使天子祀明堂推恩徙華州觀
察使獻穆大長公主薨起復為鎮國軍節度觀察
留後公泣血辭讓願終喪制上不許其讓許其終
喪給以全俸服除拜鎮潼軍節度觀察留後累階
金紫光祿大夫勲上柱國爵開國公食邑四千四
百戶實封九百戶公為兒時上在東宮真宗命公

侍研席上尤親愛嘗解方玉帶賜之稍長出入宮
禁禮如家人雖燕見語不及私數為上陳朝廷闕
失開說古今治亂多所補益退而未嘗言公既薨
得其遺藁之未上者言宋室事甚詳其餘不傳公
少自勉勵見士大夫有失節廢義者輒嘆曰士起
寒苦以學行自名至牽利欲遂亡其所守况驕佚
易習而生長富貴間邪故常惕然痛自刮磨思立
名節聞一善士傾身下之而賢士大夫亦樂與之

遊以此多得名譽方大長公主在時數欲求外官
以自効不可得久之出知冀州為政循法度檢身
束下民以不擾歲滿召還初在冀捕妖人李校校
窮自經死驗得實矣後貝州妖賊王則閉城叛聲
言校在以惑衆公坐貶官已而則誅城開無李校
者乃還公防禦使又知鄆州安撫京東之西路是
歲京東水災民饑流亡公為治室廬發倉廩而流
人至者如歸咸賴以全活置弓手馬教其馬鬪皆

如精兵治汶陽堤百餘里鄆人遂無水患又知澶
州發軍吏之姦者去之流其尤者於遠方然後明
軍籍均其勞逸軍中稱平而畏其法始下令捕盜
有登隣屋取一杓者遽寘之法以徇於市曰是固
足以信吾令由是盜賊屏息公雖以公主子自少
居京師常領職事其在三班院尤為稱職三班掌
諸使臣功過黜陟而主者皆顯官自重或貴家子
食俸廩而已吏得因依為姦而職廢久不省至公

始躬治簿書考覈虛實賞罰必當後人多遵用其
法及出為三州又皆有治狀故雖享年不永不究
其所施而士君子皆知其非安於富貴者也及聞
其喪也莫不痛惜焉公自為鎮潼留後十年不遷
上以其久也以為寧遠軍節度使公懇辭不拜及
其薨也遂贈感德軍節度使公享年四十有八娶
郭氏封仁壽郡君先公九年卒贈太原郡夫人西
京左藏庫使昌州團練使中和之女子男五人長

曰詵供備庫副使次日諲曰詢皆右侍禁次日諄
曰訢尚幼女四人長適皇姪右屯衛大將軍吉州
團練使建安郡公宗保早卒次適秘書丞夏倚次
適皇姪左領軍衛大將軍宗景次適皇姪孫右監
門衛將軍世逸公平生嘗語其子弟曰吾蒙國厚
恩未有以報吾且死宜有遺言毋因以求恩澤及
其薨也其家如其言銘曰

允矣和文惟時顯人蔚有士譽匪矜帝姻賚其子

孫列爵啟國惟公承之克似其德士起寒家驕于
滿盈紛其利欲敗節隳名公生盛族赫奕高明都
尉之子天子之甥惟謹惟恭其色不懈聞善如貪
在得思戒間亦宴見忠言告猷學而從政有惠三
州享其多美獨不遐年高旌巨節以貴于泉昌又
贈之金璫附蟬寵渥榮名惟有其實刻詩同藏其
固其密

呼延贊墓

在朱僊鎮之東北原上咸寧三年贊
掌護元德皇后園陵儀衛還卒葬此

丹陽伯墓

在城西八角保大營鋪南
宋丹陽伯葛景先葬于此

曹僊姑墓

在城南關店保
古之新里鄉也

李總管墓

在城東南赤倉保元南康路
總管李鐸大梁人歸柩葬此

游平章墓

在朱僊鎮保元江淮行
省平章事游顯堊此

周令公墓

陶令公墓

以上二墓俱
在關店保

高左丞墓

在城東南史胡鋪之北元河南行
省左丞封梁國武定公高興堊此

梁國公墓

在朱僊鎮保棗林莊
元梁國公楊澤葬此

程鉅夫撰楊氏先塋記 遂古之初不封不樹中

古墓而不墳成周之時始以爵等為丘封之度與其樹數設官掌之漢律列侯墳高四丈自是以降其制益明天祿辟邪之屬亦各有差等所以辨貴賤定民志也聖天子以仁孝治天下加惠臣鄰無有幽顯孝子慈孫之心咸翼然以奮嗚呼教孝勸忠之政不其美歟梁國楊文懿公之墓在大梁祥符縣魏陵鄉伯俞村先是公之二子敬直元直遵禮經廣兆域至於表羨道識玄堂猶有竢也二子

既受簡知至大三年秋七月詔推恩其祖禰明年
夏四月又賜碑墓道遣將作院使野訥傳旨集賢
大學士李謙為之文冬十有一月又加贈賜謚時
敬直以轉運使官兩淮元直以太醫院使侍禁中
皇慶元年夏六月元直請歸脩治先人塚及樹所
賜碑不許乞聽兄離職行事乃許敬直承恩奉詔
惟謹明年春正月元直復泣請于興聖宮又不許
請至二十餘終不許曰爾為爾親吾為吾子孫也

且爾兄在豈必爾其命河南行省給費為爾成之
元直曰以公給私不可固辭從之乃賜楮幣萬五
千緡仍督行省相其役二月復遣刑部郎中楊某
賜河南丞相尚醢二壺以申敕之明年三月壬子
丞相身率僚佐共建勅賜神道碑于墓右寓公鄉
老及四方來觀者萬數莫不咨嗟歎息曰非盛德
之後能若是乎改作祠堂三楹秦國公李孟為榜
曰致嚴壙未有銘集賢侍講學士趙孟頫銘之墓

前有表參知政事賈鈞書之墓南二丈有石門刻
御史中丞郝天挺之字曰楊氏先塋塋前石人獸
如制又南去二百五十尺華表雙高國子祭酒劉
賡題其衡顏曰梁國公神道有碣路左書曰大司
徒梁國公墳則鄂國公史弼書也中以畝計者十
五垣以甃外以丈計者六百繚以墻樹榆柳栢松
數萬鬱鬱如屯雲翼翼嚴嚴遼遼極目前臨官道
過者竦瞻咸曰此非教忠之原發祥之兆乎蓋是

舉也金工石工木工土工凡六十有奇其費上賜之外竭家之有猶不足也冬敬直元直乃圖其成請記於所知程某曰兄弟幸賴先訓歷事累朝被遇兩宮隆恩異數顯寵若此非勒之金石何以表君上示子孫且辱知於子餘三十年矣其為我記之某曰余聞仲尼之言封崇矣有若堂者有若防者有若覆厦屋者有若斧者合葬於防從若斧者焉此足以觀聖人慎終之一節也君子不以天下

儉其親聖人亦從事之宜而已故有其位有其財
與其時君子莫不盡心焉非以為泰也非以為觀
美也所以勸也所以事君事親也昔有身為冢宰
乃家廟之不營而祭於寢司寇劾之者有傷其生
無以為養死無以為禮聖人非之者過於宜而已
若楊氏兄弟之廉敏端惠孝友敬篤其事君也外
則于藩于宣而致其理內則夙夜在公而致其勤
其事親也生事葬祭咸致其誠則於事君事親之


禮講之亦久矣宜能位並九卿澤及三世軌物備制遂其所俟嗚呼此忠臣孝子之事也至於啓發人之善心使之思教子思立身以及於事君事親之本其得於觀感羨慕者又不知其幾何人也詩云孝子不匱永錫爾類其是之謂乎是宜有記嗟夫楊氏之子子孫孫毋怠毋荒丕念爾先丕敬厥德其克永世哉公諱澤字潤夫凡再被贈恩階曰榮祿大夫官曰大司徒勲曰柱國梁國其封文懿

其謚也其行已載所賜碑敬直今為江西等處行
中書省參知政事元直昭文館大學士太醫院使
掌醫卿延祐二年十月某記

周密癸辛雜識 趙松雪云北方多唐以前古塚
所謂墓誌者皆在墓中正方而上有蓋豐下殺上
上書某朝某官某人墓誌此所謂書蓋者蓋底兩
段用鐵局拘之後人立碑於墓道其上篆額後訛
為蓋非也今世歲月志乃其家子孫為之非所謂

墓碑也古者初無歲月志之石

自李總管而下諸墓皆宋以後人姑附于此



汴京遺蹟志卷九

欽定四庫全書

史部
汴京遺蹟志卷十一

詳校官左都御史_臣李紱

編修_臣程嘉謨覆勘

覆校官主事_臣龔敬身

校對官中書_臣李豫

謄錄監生_臣陳元熙

欽定四庫全書

汴京遺蹟志卷十

明 李 濂 撰

寺觀

寺

相國寺

在縣治東北齊建國寺天保六年創建後廢唐爲鄭審宅國審宗景雲初遊方僧慧雲睹審

後園池中有梵宮影遂募緣易宅鑄彌勒佛像高一丈八尺值睿宗以舊封相王初即位因賜額爲相國寺玄宗天寶四載建資聖閣東塔曰普滿西塔曰廣願宋真宗咸平四年增建翼廊三門前樓迎取潁川郡銅羅漢五百尊置于閣上神宗元豐中增建東西兩廂又立八院東曰寶嚴寶梵寶覺慧林西曰定慈

廣慈普慈智海金元兵燬國朝洪武初重脩改賜額
爲崇法禪寺置僧綱寺於內而併南北大黃景福三
寺入焉後累經黃河入城廊廡無僧舍多被湮
塌今所存者聖容殿結構奇絕蓋舊殿也

陳后山談叢 相國寺樓門唐人所造國初木工

喻浩曰他皆可能惟不解卷簷爾每至其下仰而
觀焉立極則坐坐極則卧求其理而不得門內兩
井亭近代木工亦不解也寺有十絕此爲二耳

沈括夢溪筆談 相國寺舊畫壁乃高益之筆有

畫衆工奏樂一堵最有意人多病擁琵琶者誤撥

下絃衆管皆發四字琵琶四字在上絃此撥乃掩
下絃誤也余以爲非誤蓋管以發指爲聲琵琶以
撥過爲聲此撥掩下絃則聲在上絃也益之布置
如此其心匠可知

郭若虛圖畫見聞誌 治平乙巳歲雨患大相國
寺以汴河勢高文進等畫惟大殿東西走馬廊西
對門廡不能爲害東門之南王道真畫給孤獨長
者買祇陀太子園因緣東門之北李用及與李象

坤合畫牢度义關聖變相西門之南王道真畫誌
公變相十二面觀音像西門之北高文進畫降魔
變相今並存之皆奇迹也其餘四面廊壁皆重脩
後復集全時名手李元濟等用內府所藏副本小
樣重臨倣者然其間作用各有新意焉

又曰大相國寺碑稱寺有十絕其一大殿內彌勒
聖容唐中宗朝僧慧雲於安業寺鑄成光照天地
爲一絕其二睿宗親感夢於延和元年七月二十

七日改故建國寺爲大相國寺睿宗御書牌額爲
一絕其三匠人王溫重裝聖容金粉肉色并三門
下善神一對爲一絕其四御殿內有吳道子畫文
殊維摩相爲一絕其五供奉李秀刻佛殿障日九
間爲一絕其六明皇天寶四載乙酉歲令匠人邊
思順脩建排雲閣爲一絕其七閣內西頭有陳留
郡長史乙速令狐公爲功德主時令石抱玉畫護
國除災變幻相爲一絕其八西庫有明皇先勅車

道政往于闐國傳北方毘沙門天王樣來至開元
十三年封東嶽時令道政于此依樣畫天王像爲
一絕其九門下有瓊師畫梵王帝釋及東廊障日
內畫法華經二十八品功德變相爲一絕其十西
庫北壁有僧智嚴畫三乘因果入道位次圖爲一
絕也

宋次道東京記亦載相國寺十絕
乃是後來所見事迹此不具錄

宋朝燕翼詒謀錄 東京相國寺乃瓦市也僧房
散處而中庭兩廡可容萬人凡商旅交易皆萃其

中四方趨京師以貨物求售轉售他物者必由于
此太宗至道二年命重建三門爲樓其上甚雄麗
宸墨親填書金字額曰大相國寺五月壬寅賜之
王君玉國老談苑 王嗣宗爲御史中丞真宗一
日幸相國寺回自北門嗣宗上言曰天子行黃道
豈可由後門臣任當風憲詎敢廢職乎上悅其直
給內帑三千緡以自罰由是北門不常開

程大昌演繁露 世傳相國寺門舊扁題云相國

之寺凡四字或以之字爲贅遂命除之別添大字
其文曰大相國寺於體既該於文無贅最爲可傳
然扁題字數奇不偶者徃徃皆增之字不知起自
何時漢武帝太初元年改正朔易服色色尚黃數
用五故印文必五如丞相之印章則是四字外添
一之字以應五數下及諸卿守相印文凡不及五
者亦皆加一之字以足之後世但見太初嘗增之
字遂倣效之凡印文以及門堂扁額槩增一之字

以求合于古殊失本意

周密癸辛雜識

相國寺佛殿後壁有咸平四年

翰林高待詔畫大天王尤雄偉殿外有石刻東坡
題名云蘇子瞻子由孫子發秦少游同來觀晉卿
墨竹申先生亦來元祐三年八月五日老申一百
一歲又片石刻坡翁草書峭遍石色皆如玄玉

蔡條鐵圍山叢談 藝祖始受命久之陰計釋氏
何神靈而患苦天下有欲廢其教之意一日微行

至相國寺將昏黑俄至一小院戶旁望見一髡大
醉吐穢于道左右方惡罵不可聞藝祖陰怒適從
旁過忽不覺爲髡攔胸抱定曰莫發惡心且夜矣
懼有人害汝汝宜歸內可亟去也藝祖默心動以
手加額而禮焉髡乃捨之去藝祖還內密召忠謹
小璫爾行往某所覘此髡在否且以其所吐物狀
來及至則已不見小璫獨爬取地上所吐狼籍至
御前視之悉御香也釋氏教因不廢

王鉉默記 李後主手書金字心經一卷賜其宮人喬氏喬氏後入太宗禁中聞後主薨乃自內庭出是經捨於相國寺之西塔院以資冥薦且自書於後曰故李氏國主宮人喬氏伏遇國主百日謹捨昔時賜妾手書般若心經一卷於相國寺之西塔院伏願彌勒尊前持一花而見佛云云其後江南僧持歸故國置之天禧寺塔相輪中寺後被火相輪自火中墮落而經不損爲金陵守王君玉所

得君玉卒子孫不能保之以歸寧鳳子儀家喬氏
書在經後字甚整潔而辭甚愴惋所記止此徐錯
集南唐制誥有宮人喬氏出家誥豈斯人邪

余少時嘗讀書相國寺僧舍中見大殿前有古
碑二十餘多可觀者今四十餘年矣昨偶至寺
遊覽止見三二碑剝落漫漶皆不可誦餘不知
所在徘徊其下久之重爲之憮然

上方寺

在城之東北隅安遠門裏夷山之上即開寶寺
之東院也一名上方院宋仁宗慶歷中開寶寺

靈感塔燬乃於上方院建鐵色琉璃磚塔八角十三層高三百六十尺俗稱鐵塔寺舊有漆胎菩薩五百尊并轉輪藏黑風洞洞前有白玉石佛後殿內有銅鑄文殊普賢二菩薩騎獅象蓮座前有海眼井世謂七絕元末燬于兵海眼井亦久失其處國朝洪武十六年僧祖全募緣重建

周密癸辛雜識 光教寺在汴城東北角俗呼爲上方寺有琉璃塔十三層鐵普賢獅子像甚高大座下有井以銅波斯蓋之泉味甘謂通海潮旁有五百羅漢殿又云五百菩薩像皆是漆胎粧以金碧窮極精妙

上方寺塔前有行書碑一題曰大宋東京右街
重修等覺禪院記乃咸平戊戌尚書職方郎中
賜紫金魚袋王嗣宗撰隴西彭太素書字體流
暢頗類西安聖教序汴城石刻惟此爲最耳

開寶寺

舊名獨居寺在上方寺之西北齊天保十年朔
建唐開元十七年玄宗東封還至寺改曰封禪

寺宋太祖開寶三年又改曰開寶寺重起繚廊朵殿
凡二百八十區太宗端拱中建塔極其偉麗初釋迦
佛舍利塔在杭州佛書所謂阿育王七寶塔也及吳
越王錢俶歸宋太宗遣供奉官趙鎔取真寺內度龍
地瘞之時木工喻浩有巧思超絕流輩遂令造塔八
角十三層高三百六十尺其土木之宏壯金碧之炳

耀自佛法入中國未之有也真宗大中祥符六年有
金光出相輪車駕臨幸舍利乃見因賜名靈感塔仁
宗慶歷四年塔燬于火其殿
宇廊廡僧舍俱燬于金兵矣

歐陽修歸田錄

開寶寺塔在京師諸塔中最高

而制度甚精都料匠預浩所造也塔初成望之不
正而勢傾西北人恠而問之浩曰京師地平無山
而多西北風吹之不百年當正也其用心之精如
此國朝以來木工一人而已至今木工皆以預爲
法有水經三卷行于世世傳浩惟一女年十餘歲

每卧則交手於胷爲結構狀如此踰年撰成水經
三卷今行於世者是也

楊文公談苑 帝初造塔於開寶寺得浙東匠人
喻浩浩性絕巧乃先作塔式以獻每建一級外設
帷帟但聞椎鑿之聲凡一月而一級成其有梁柱
齟齬未安者浩浩周旋視之持巨槌撞擊數十即皆
牢整自云此可七百年無傾動人或問其北面稍
高浩浩曰京城多北風而此數十步乃大河潤氣津

浹經一百年則北隅微墊而塔正矣浩素不茹葷

求度爲僧數月死世頗疑其異

喻浩或作預浩未知孰是

僧文瑩玉壺清話 郭忠恕畫樓閣重複之狀梓

人較之毫釐無差太宗聞其名詔授監丞時將造

開寶寺塔浙匠喻浩料一十三層郭以浩所造小

樣末底一級折而計之至上層餘一尺五寸收殺

不得謂浩曰宜審之浩因數夕不寐以尺較之果

如其言黎明扣其門長跪以謝

道山清話 元祐癸酉九月一日夜開寶寺塔表裏通明徹旦禁中夜遣中使齋降御香寺門已閉既開寺僧皆不知也寺中望之無所見去寺漸明後二日宣仁上僊

按宋史端拱中開寶寺塔成侍御史田錫上疏曰衆謂金碧熒煌臣以爲塗膏纒血帝亦不怒絲是觀之太宗輕用民力以作無益固不能免千古之譏然能容受讜言不罪諫者抑亦可謂

賢已

寶相寺

在大梁門外世傳古鎚和尚證果之處五代唐明宗長興元年初建晉高祖天福三年賜額內

有慈尊閣與彌勒佛大像俗名大佛寺寺之內又有羅漢洞及羅漢塑像五百尊元末俱爲兵燬洪武二十年都綱善春因故址重建

周密癸辛雜識

汴城寶相寺俗呼爲大佛寺有

五百羅漢塑像甚奇古又喫水石龍鐫刻甚精皆

故宮物也

孝嚴寺

在城之西北隅舊金水門內即宋太尉楊業之家廟也雍熙丙辰五月業死節朔方其子請改

家廟爲寺以薦其父太宗嘉其孝乃俞其請賜額曰孝嚴宋鼎南遷燬于兵火國朝洪武二十二年己巳僧本福重建三十一年戊寅黃河入城淪于水正統十二年丁卯僧祖習脩葺完整

天王寺

在安遠門外前代創建無考後殿畫壁乃張世祿筆極奇絕歲久剝落盡矣惜哉

天清寺

在陳州門裏繁臺上周世宗顯德中創建世宗初度之日曰天清節故名其寺亦曰天清寺之

內磚塔曰興慈塔俗名繁塔宋太宗太平興國二年重修元末兵燹寺塔俱廢國朝洪武十九年僧勝安重建永樂十三年僧禧道等復建殿宇塑佛像

王銍默記

藝祖初自陳橋推戴入城周恭帝即

衣白襴乘轎子出居天清寺天清世宗節名而寺

其功德院也

國相寺

在天清寺南即天清寺之前樓三間國朝洪武十七年僧勝安因樓廢址改建佛殿名曰國相

二十一年僧淨慈增建觀音堂方丈廊廡三門

白雲寺

在天清寺西北即天清寺之白雲閣廢址也國朝洪武十九年僧勝安圓真於其址重建殿宇

佛像仍其舊名曰白雲寺

李夢陽撰國相寺記

國相寺繁臺前寺也臺三

寺後曰白雲中曰天清塔斷而中立有鸛巢其上

戛戛鳴按夢華錄繁臺寺一耳亦不言其地之盛

嘗問之老長曰寺一耳而三其教中教之講僧王
色禰衫後教之禪深褐禰衫前教瑜伽淺褐禰衫
而寺遂三後有白雲閣於是號白雲寺中有天清
殿於是號天清寺前有國相門於是號國相寺寺
分勢孤時遷世殊於是崇者頽而下者蕪僧闕教
汙庸師惡徒於是樹石盜亡損破烏鼠穢之往來
羊猪寺非若能主矣又國初剋王氣塔七級去其
四崩嚙幽窟狐狸魑魅昏嘯陰啼僧席未暖業逃

去而善彬者國相僧也乃奮然興曰寺時世廢邪
僧廢之邪於是守一清修年七十餘步詣戒壇受
戒持之於是寺得不土平者彬之力也汴城以水
湮故諸古蹟茫然蕩然獨斯臺巋然存峻峙可遊
遊者挈醪榼載吟筆花晨月夕雪驢風馬無不扣
彬之門者斯足知彬也正德間彬葺其寺殿暨伽
藍閣山門鐘樓僧房等而睢陽衛百戶趙鉞等實
助之涅塑其像設按舊碑寺宋太平興國二年建

今洪武初僧古峯者新之相去四百餘年迨彬又百五十年餘矣而空同山人爲之記

觀音寺

在城東南萬龍岡元至正元年僧了空建國朝宣德五年僧德廣重修

萬壽寺

在城北周八寨國朝洪武元年僧德淨建天順二年僧真賢重修

隆興寺

在城東北堽盆鋪國朝天順元年僧德忠建成化十年僧真果重修

清涼寺

在城東梳頭岡國朝景泰元年僧本朗建天順八年僧真能重修

一軒寺

在巨盈庫西北元末兵燬

雲老寺

在儒林街北元末兵燬其遺址今爲祥符縣儒學

興國寺

有二一在馬軍橋東北宋太平興國間創建金季兵燬元改爲文濟王府國朝洪武初爲宋國

公馮勝宅一在城西西和保宣德元年僧覺慧建成化十六年僧德來重脩

楊文公談苑 太平興國寺舊龍興寺也周世宗

廢爲龍興倉國初寺主僧屢擊登聞鼓求復爲寺
上遣中使持劔以諭之曰此寺前朝所廢爲倉殿
以貯軍儲汝何故煩瀆帝庭朝命斷取汝首仍戒
之曰倘偃蹇怖畏即斬之或臨劔無懼即未可也
既諭神色自若引頸就戮上聞之感嘆復命爲寺

宋朝會要 興國寺乃唐龍興寺也開寶二年詔

重脩太平興國元年賜今額

明福寺

在雷家橋西南武成王廟之西金宣宗時展城廢燬

慈孝寺

在雷家橋西北故駙馬都尉吳元康宅也天聖二年十二月詔建寺奉真宗神御初議名慈聖

時太后號有此二字改賜今名戒壇院本寺園寶元初僧文旦創建戒壇慶歷五年賜額戒壇院金末兵燬

報慈寺

在鐘樓東北後巷燬于金兵

龜兒寺

在相國寺西北洪武四年改爲兵馬指揮司而寺隨以廢

安業寺

在鼓樓東北釘秤巷燬于金兵

乾明寺

在安業坊席箔巷西燬于金兵

廣福寺

在廣福坊上方寺之西南後廢爲大梁衛營

惠安寺

在上方寺之西南俗名破塔寺元末兵燬

鐵佛寺

有二一在大梁門外西北金水河堤之南今廢一在相國寺東相傳亦本寺禪院今見存

顯聖寺

在大梁門外西北白溝河之南俗名菩提寺周顯德四年創建金末兵燬

巴樓寺

在城西金水河南元末兵燬

鴻福寺

有二一在城西金水河北元末兵燬一在城東北沙窩岡宋崇寧元年建國朝咸化十六年僧

本資
重脩

地湧佛寺

在鄭門裏之南元末兵燬

法雲寺

在南薰門外雲驥橋之西元末兵燬

景德寺

在麗景門外迤東周世宗顯德五年以相國寺僧多居隘詔就寺之蔬圃別建下院分處之俗

呼東相國寺顯德六年賜額天壽寺宋真宗景德二年改名景德寺後有定光釋迦舍利磚塔累經兵燹

河患今
為平地

惠明寺

在仁和門北周太祖廣德中初建金李兵燬

乾寧寺

在仁和門外金李兵燬

太師寺

在縣治西北元太師伯顏宅也後改爲寺今爲大梁驛

華嚴寺

在鄭門外西南金兵燬之

兩浙寺

在城西金水河側金兵燬之

奉聖寺

在城南鳳城岡之上金李兵燬

水魚寺

舊名興國寺在城南閘店保宋時建金李兵燬元僧滿講主擊水魚化緣重建因名水魚寺密

邇來僊鎮亦名寺也

旌德寺

在城東南神岡上元末兵燬

母寺

一名保福寺在城北母寺保元于氏子母二人脩建後淪于河水

奉先寺

在城西金明池之西宋建以祭宮人之所金兵燬之

十八聖寺

在封丘門外之東因有白塔又名白塔寺元末兵燬

清鐘寺

在大梁門外蓮花池之後

顯靜寺

在陳州門裏周世宗顯德二年初建金兵燬之

普求寺

在白墓子岡西北

以上皆僧寺或存或廢然亦有湮沒無可考者

矣

慶壽寺

在大梁門外建隆廟元至正間尼僧普謙初建後廢國朝洪武五年尼僧洪心等重脩

永寧寺

在大梁門外慶壽寺西元至正間尼僧普義
初建後廢國朝洪武三年尼僧盛得重脩

打瓦寺

在土市子街東北惠和坊始建無考元末
兵燬國朝洪武二十年尼僧義果等重脩

觀音寺

在上方寺前
周府初建

文殊寺

在鼓樓東北釘秤巷之東信國公湯和宅
舊基也國朝永樂十三年尼僧悟善初建

彌陀寺

在大寧坊木場街之東南國朝
洪武二十年尼僧義慶等初建

以上皆尼寺慶壽永寧打瓦三寺俱廢而觀音

文殊彌陀三寺見存

北太黃寺

在城東北陳橋南宋仁宗曹太后勅脩元
末兵燬國朝洪武二十年僧法玉重建

南太黃寺

在城東北母寺保張耳塚之西元末兵燬國朝洪武十五年僧本受重建

景福寺

在城東北馬尾牆保始朔無考元末兵燬國朝永樂十年僧福寶重建

以上三寺俱歸併於相國寺

觀

延慶觀

在城內汴河之北浚儀橋之西舊為朝元萬壽宮齋堂今軍儲倉即朝元萬壽宮之遺址也元

世祖時盤山棲雲道人王志謹建元末偽宋太保劉福通廢之惟存齋堂耳國朝洪武初為寶泉局鑄錢之所後移局於蔡河灣而齋堂悉已頽毀洪武六年設道紀司於內十年都紀邵惟真副都紀鄭德柔等改建正殿奉安三清又建左右高真之殿及東西兩廡永樂十年都紀趙德信又建三門煥然一新內有

宋時諸名公石刻甚多
今悉散失無復存者矣

陳頤閑中今古 開封趙宋建都之處予每追訪
古蹟故老僅能道其一二形似而已府學中諸碑
刻多宋太學中石經皆磨滅破碎罕有完者間有
徽廟時詩文亦首尾弗全周視齋廡見石礎俱斷
碑隱然文字在上學子言不特此耳爲在位之人
取爲宅用者甚衆後於延慶觀東偏道士房見一
石刻乃蘇子美所作詩瓜果浮沈酒半醺滿牀書

史亂紛紛北軒涼吹開疎竹卧看青天行白雲因
錄於此以見當時士大夫其所著述何可勝數如
此詩者不過一時口占尚刻之於石則其他大述
作而爲世所珍重者不爲後人柱下之石能幾何
哉

又曰成化間黃河邊有龍生一卵在葦泊中大如
升許漁者得焉一商人以布易之送於官置諸延
慶觀居民異之觀者如堵時盧龍周斌知開封府

以其惑亂人心擊碎之中色碧水餘無所有數日
後俄有大風自觀中起拔庭前兩水從東北去拔
都司前一大木又拽去左布政章繪衙內樓後半
間未幾繪被原傑侍郎考黜斌擢陝西參政去禍
福有定不可惑也併記之

佑聖觀

有二一在城內西南隅馬軍衙橋之西觀前有積水夙著靈異正德初改爲大道宮一在陳州

門裏普濟水門
西北金李兵燬

三清觀

在安遠門內東南始創未詳永樂三年建天順五年淪于水成化十四年重修

余少遊是觀見壁上有李獻吉詩云二十年前
走馬地三清臺殿肅清高重來無限春風思不
似劉郎爲看桃今空同集中不載

玉陽觀

有二一在大梁門內即楊六郎宅址也一在城隍廟後近西街北乃金章宗時汴京之永豐倉

也金季兵燬元世祖時盤山棲雲道人王志謹于其處建觀以居全真道人統塵子陳志寶元末改爲忠襄王察罕特穆爾祠堂國朝洪武初又改爲河南布政司巨盈庫

建隆觀

初名太清觀在大梁門外西北周世宗所建宋太祖以建隆改元遂更名爲建隆觀重脩殿宇

廊廡總一百四十有九區後取杭州昊天上帝銅像奉安于中真宗大中祥符元年以唐秘書監賀知章

七代孫道士某住持是觀加葺
吳天上帝殿其後皆燬于金兵

會靈觀

在南薰門外東北普濟水門西北宋大中祥符五年創建內設延真獻殿祝禧齋殿西則崇元

殿以奉靈寶天尊二夾殿則奉中茅小茅真君東西列五岳聖帝五殿左右二夾殿則奉五岳之儲副佐命之山羅浮括蒼霍山抱犢少室武當等十山真君初名五岳觀觀成賜名會靈李若谷罷參知政事留京師以資政殿大學士提舉會靈觀事宮觀置提舉自此始觀南有奉靈園觀東有凝祥池中有崇禧殿觀西墻有小池中亦建崇禧殿奉扶桑大帝賜谷神王洞淵龍王等神續又增置明麗及臨水二殿後皆燬于金兵

宋朝會要 大中祥符八年五月詔會靈觀池以

凝祥爲名園以奉靈爲名觀以奉五岳帝仁宗時

觀火既重建改名曰集禧

祥源觀

在繁臺東南宋初有人於此地見龜蛇因建真武堂真宗天禧二年泉湧堂側汲之靡竭人有

疾疫者飲之輒愈乃就其地建觀總殿廡神廚鐘經樓齋堂道院廨舍凡六百一十三區其正殿曰靈真以奉真武像加號靈慈真君東聖藻殿以安御製贊西靈淵殿湧泉之所前廣聖殿西開祥齋殿南有靈禧園東有凝碧池乃唐汴牧澤改爲池後皆燬于金兵累經河溢淤平

宋朝會要

醴泉觀本拱聖營地也天禧二年閏

四月詔拱聖營醴泉所宜立觀以祥源爲名仁宗

時觀火既重建改名曰醴泉東水門裏亦有醴泉

觀與此不同

萬壽觀

在景龍門西北本玉清昭應宮東偏別殿也天聖七年夏六月玉清昭應宮灾燔焚殆盡惟存

長生崇壽二殿并章獻太后本命殿後稍脩葺改崇壽殿名太霄殿徙奉玉皇銅像增繕寶慶延聖二殿及膺福齋殿崑玉池亭又葺章懿太后御容殿改名萬壽觀後皆燬于金兵

宋朝燕翼詒謀錄 萬壽觀本玉清昭應宮也宮

爲火所焚惟長生崇壽殿存殿有三像聖祖真宗各用金五千餘兩昊天玉皇上帝用銀五千餘兩

仁宗天聖七年詔玉清昭應宮更不復脩以殿爲萬壽觀蓋明肅太后尚有脩營之意宰臣猶帶使領至是始去之示不復脩營也真宗朝盛禮縟儀屢舉費金最多金價因此頓長人以爲病仁宗明道二年正月癸未詔冊寶法物凡用金者並改用銀而以金塗之自此十省其九至今惟寶用金餘皆金塗也

林希兩朝寶訓 天聖七年七月

紀年通載云六月

玉清

昭應宮災上以所存長生崇壽殿爲萬壽觀

天慶觀

大中祥符二年十月詔天下州府軍監關縣皆建道觀一所以天慶爲名

醴泉觀

在東水門裏宋真宗大中祥符元年五月泰山醴泉出詔於其地建醴泉觀後復建觀於京城

金季
兵燬

西五岳觀

在南薰門外街西宋時建以奉五岳之神國朝洪武二年夏五月爲震電雷火所燬

南山觀

在安遠門裏街西三皇廟之南始建無考元末兵燬

四聖觀

在相國寺橋之南始建無考金季兵燬

延真觀

在南薰門裏西南始建無考元末兵燬

玉霄觀

在大梁門外今三聖堂之北始建無考元末兵燬

以上諸觀皆道士居之自建隆觀而下俱久廢
無一存者

馬端臨文獻通考 宋自真宗興崇道教置玉清
昭應宮景靈宮會靈觀使以宰相爲之副使判官
都監及集禧觀醴泉觀東西太一宮提舉則以兩
省兩制丞郎及防禦諸司使副爲之掌奉齋醮之
事又有譯經潤文使亦以宰相爲之熙寧以後增

置祠祿之官以佚老優賢而時相欲以宮觀之祿處不奉行新法之人遂無限負亦無執事而釋老之事則如歷代領之祠部郎官又屬鴻臚寺至徽宗時改隸秘書省

洞源觀

在大梁門外大佛寺迤西宋仁宗景祐二年富平郡王姑施氏願入道爲女冠乃以崔懷道私

第八十間改爲道觀賜名洞源後燬于金兵

遇僊觀

在仁和門內街南元時建國朝洪武三十二年淪于河水永樂十年女冠李雲山重建

逍遙觀

在仁和門內街南元英宗至治三年綽建國朝洪武十八年女冠李妙方等重建

以上三觀皆女冠居之俱久廢無一存者

汴京遺蹟志卷十